

Bagnvulent anvers la gronda festa

Gion Nutejn Stgier/FMR

Ainten la regiun Alvra, ma cunzont an Surses è la bagnvuglientscha anvers la Festa federala da teir 2026 immens gronda. Cumegns, firmas, hotels, restorants e persungas privatas èn an l'egna u l'otra moda sa mussos generous.

Igls organisatours dalla Festa federala da teir cun consiglier naziunal Martin Candi-

nas scu president digl comite d'organisa-ziun on chegl tgi pertotga igl sponsoring presto lavour exemplarica. Digl preventiv da 14 milliuns francs schea la somma da sponsoring tar 4 milliuns francs.

Igls bungs contacts digl parsoura digl comite d'organisa-ziun, digl schef da finanzas André Renggli e digl secretari general Carl Frischknecht on purto fretgs.

S'angaschedas èn alloura er fitg bleras otras persungas cun eir alla tschertga da sponsours, inserents, premis pigl schinumno «Gabentempel» e per donaziuns an furma

da daners. Involvas cun eir alla tschertga da sponsours dalla festa da teir èn er stadas las 20 uniuns da teir tgi segnan igl proxim meis per l'organisa-ziun.

Tschintg stetgs èn nias cumpros an Surses

Vurdo sur la regiun Alvra ed an spezial an Surses ins dastga deir tgi la bagnvuglientscha anvers la Festa federala da teir 2026 è stada gronda. Bagn savond tgi dall'occurrenza da sagettar profitessa er la regiun Alvra cun er aveir li igl teir a Crappa Naira ed a Rona.

Interpresas e firmas dall'antiera Svizra on er gia la pussebladad da comprar egn digls passa 140 stetgs. Chegl vot deir tgi chellas interpresas e firmas segnan scu sponsour digl stetg cumpro.

Da Surses on tschintg travagls cumpro mintgamai en stetg. Chegl èn: Cumegn da Surses, Cavegn SA Savognin, Scrinareia Giovanoli SA, Beiva, Luzio Electro Telecom, Cunter ed Uffer SA, Savognin. Sustignia igl sponsoring cun ena bela somma on er igls dus cumegns Albula/Alvra e Vaz.

Beleza prietschs da treis scrinareias da Surses

En fatg plaschevel è alloura er tgi diesch firmas, er cò cunzont da Surses on sustignia la Festa federala da teir 2026 finanziaimaintg cun ena pi gronda somma.

Sa mussos generous èn las interpresas, las organisa-ziuns turisticas, hotels e restorants er cun far en inserat pi pitschen u pi grond per ena somma d'anfignen 1200 francs.

Gist diesch inserents è sto pussebel da catter da Beiva anfignen Lai.

Beleza prietschs pigl schinumno «Gabentempel» dereivan dallas scrinareias Arpagaus SA, Savognin, Demarmels SA Salouf ed Uffer SA, Cunter.

Ena valour da 420 000 francs

Passa 20 interpresas da Surses e varsaquantas dalla Val Alvra on do en premi pigl taimpel da premis tgi sa catta a Coira.

Er graztga a chels bels premis, scu skis, rezgias a motor, cadagnas da crap, bons, products da cosmetica, radios ed er blers oters premis, schea la valour digls premis tar 420 000 francs.

Igl taimpel da premis vign exponia per en meis alla Obere Au a Coira.

En premi singular dereiva digls organisatours dalla davosa festa federala da teir 2021 a Lucerna, numnadamaintg ena vatga dalla razza «Eringer».



En bel banc scu premi dalla firma Uffer SA, Cunter.



Bels prietschs er chellas cadagna da crap d'Andeer.

Fotos Gion Nutejn Stgier